

（四縣腔）

編號 01 號

【老鄰舍】張美容原作

戴在都市肚，隔壁鄰舍相堵頭¹，盡多就笑笑仔、頷下頭，無麼个有相借問，就算日時頭，儕儕也門門閉戶罕得來往，看著恁樣，佢特別懷念細人仔時个老鄰舍。

頭擺佢戴在莊下个街路肚，鄰舍多，大家長下這家行行、該家寮寮。像對門做西裝个矮師傅屋下，大家就盡愛去，大人會去討兜布尾布截來補衫褲，細人仔就拈兜布碎仔²來份家啦，暗晡頭大人做閒乜，就在厥店亭下寮涼、打嘴鼓，一群細人仔就坐在做西裝个長桌頂寫作業、讀書，就像自家屋下樣仔。

對門還有一間阿德伯个布店，店肚花刺必駁³个布仔，當錫人，佢兜輒輒去看哪垵布仔較靚，到阿姆過家寮該下，就拉等佢去剪布做衫，雖然失望个時節較多，毋過，阿姆个「下二擺、下二擺」，還係分佢盡大个期待。在阿德伯个布店，長下夢想自家著等阿姆做个長衫⁴，有胖胖个袖仔，有胖胖个裙；有加蕾絲，有

框木米⁵，像公主樣仔。

「咕咕咕⁶，兩片生翼，背囊屙屎，肚底絡食。」隔壁做木匠个阿松伯，緊做事緊做令仔分佢兜揣，在脣項看佢鉋枋仔个細人仔，無人揣得著，阿松伯擎起鉋仔，先撈兩片手扼个柄咕咕馘馘敲核來，就開始鉋枋仔，無用个鉋燂⁷就在鉋仔个背囊頂哼等出，鉋仔肚底个枋仔就鉋到亮亮，做得用哩，原來答案係鉋仔，實在生趣。阿松伯毋單止好講笑，厥屋下滿地泥大大細細个樹砵仔⁸、勾勾勾勾个鉋燂，也係佢兜最愛搞个東西，到這下，鼻公脣像人還留等香香个木材氣味。

屋下上兩間个點心店也盡記得，一到燂香油⁹个時節，歸街路就香到奈毋得，這間點心店這下係有名个百年老店乜，一到寮日，人就多到尖毋開腳¹⁰。佢也長下會跔在錦榮叔个門口看佢鋸竹仔、破篾仔，像變奇術¹¹樣仔，做出竹交椅、竹椅轎¹²、竹桌、竹凳。其他還有剃頭店、糖仔店、冰店、打鐵店等等，逐間就裝滿佢童年个生活。「遠親不如近鄰」，對頭擺个佢來講，非常確實，無想著這下，隔壁鄰舍嘎撈生份人共樣，分人十分个感慨！

¹ 相堵頭：音 xiong' du' teu'；面對面遇到。

² 布碎仔：音 bu sui e'；碎布。

³ 花刺必駁：音 fa' la' bid' bog'；顏色多而雜。

⁴ 長衫：音 cong' sam'；洋裝。

⁵ 框木米：音 kiong' mug' mi'；鑲如木耳般皺褶的邊。

⁶ 咕咕咕：音 gid gu' gid；鉋木材的磨擦聲。

⁷ 鉋燂：音 pau' lo'；鉋出來的木頭屑。

⁸ 樹砵仔：音 su kid e'；小木頭塊。

⁹ 燂香油：音 biag hiong' iu'；爆紅蔥頭。

¹⁰ 尖毋開腳：音 jiam' m' koi' giog'；比喻人極多。

¹¹ 變奇術：音 bien ki' sud；變魔術。

¹² 竹椅轎：音 zug' i' kieu；嬰兒坐的竹椅。